

四庫全書

集部

欽定四庫全書

集部

宋百家詩存卷十三

詳校官監察御史臣孫家賢

主事銜臣徐以坤覆勘

總校官庶吉士臣倉聖脉

校對官中書臣方大川

謄錄監生臣朱紱

欽定四庫全書

宋百家詩存卷十三

嘉善曹庭棟編

西渡詩集

洪炎字玉父豫章人徽宗朝官中書舍人與兄朋龜
父芻駒父弟羽鴻父俱以詩文名時稱四洪潘邠老
有題洪氏蠟殼軒詩云封胡羯末謝龜駒玉鴻洪千
載望四謝四洪天壤同其推許如此靖康初炎家洪

城建炎三年避寇於龍潭及返室廬盡燬故其詩有
白州一炬火我歸無所歸之句嘗至楚州因水漲舟
阻有詩云昔我至止得二國士於今幾年隔違生死
梗泛萍飄乃復於此二國士謂汪信民呂居仁也炎
自少迄老栖栖湖海間然其詩瀟灑落拓絕無羈愁
淒苦之況故是難及

避寇至龍潭縣作

徑轉橋橫水林深寺據山鐘魚告闌寂松竹媚孱顏避

地欣有託依僧成暫閒東歸路不隔片片隴雲還
突兀山椒寺披榛二百年刹從五祖卜席是里僧傳溪
送無盡水林供不斷煙囊中有餘粒假息且安眠

次韻鄭公實見贈二詩

鄭侯風槩似虞薰醉飽初疑對苾芬一日君嘗南浦水
六年我踏寶峯雲詩情賦物已聞命山色溪光儻見分
羣盜何曾念王粲相逢聊喜見斯文

百濯生香真寶薰中泠取水挹清芬素娥影落秋宵月

白鶴翎翻春書雲俗客來依禪客住林花自與雨花分
扶傾不假迂儒力敢倚筆端能綴文

馮太沖置酒即事

故人回客寓蕭寺近清明春事一尊酒夜闌三尺檠風
流孔北海文字漢西京苦勸加餐飯年來太瘦生

山中聞杜鵑

山中二月聞杜鵑百草爭芳已消歇綠陰初不待薰風
啼鳥區區自流血北窓移燈欲三更南山高林時一聲

言歸汝亦無歸處何用多言傷我情

公實示間字韻詩悵然有感次韻奉和

晴暉生燠雨生寒朱夏陽春季孟間
斷鴈哀猿金馬客
落花流水石門山
蚤知蟻穴成何事
欲掉漁舟去不還
昭氏有琴無作止
戲成都賸一機關

輒笑人歌行路難
畏人無地出人間
欣逢北海孫賓石
猶是江南庾子山
野草離離隨意綠
羣鳥泛泛倦飛還
一川煙草松蘿外
何處梯雲叩九關

此國非燕南趙北我琴無濮上桑間勞生聊作夢中夢
苦語莫酬山復山觸石白雲數峯起照人明月一鉤還
德星已為荀陳聚紫氣休浮函谷關

公實再賦枇杷之什次韻

醺醪尊中酒枇杷雲外林甘餐千顆盡軟語一杯深老
境宜扶杖交情得斷金遺民伐荻去真處即吾心

公實作暴雨詩次其韻

民生唯播殖天意在農深一夜盆傾雨千家粒食心知

時占聚蟻催種有鳴禽喜是田間語青青刺水鍼

次韻即事

寄榻逢僧夏登場喜麥秋一風將浹日四月尚重裘去
矣吁何及歸與幸少休雨晴寒自戢桂魄更添愁

次韻野步

意行無遠近山徑自橫斜煙月生晴嶺風幡接暮霞影
歸巢暮燕聲散宿林鴉杖履相隨處僧垣即是家

遊都梁山

風吹古汲口雲滿都梁山執熱厭偏仄幽尋上屏顏清
泉似石乳滴瀝崑竇間乞此一瓢飲為卻千載煩山靈
知我意殷然下層巒散空作急雨漱石作甘寒一酌蕩
幽頰三咽索肺肝輕軀變滯骨塵鞅思靈關來當踏雲
至去當御風還再拜謝神休幸汝不我慳

四月二十三日晚同太沖表之公實野步

四山轟轟野田田近是人煙遠是邨鳥外疎鐘靈隱寺
花邊流水武陵源有逢即畫元非筆所見皆書本不言

看插秧栽欲忘返杖藜徙倚至黃昏

病間和公實飲酒詩

憂每傷人人自憂花蒙兩眼雪蒙頭干戈滿地不可觸
蓑笠為家何處浮秋入鳴蟬催暑去酒如凝露與清謀
寫成庾信江南賦更續相如老倦遊

戲和公實感秋對酒

青山愛客長青眼白酒知時泛白雲少日悲歡纔一瞬
中星寒暑又平分稻梁狼藉棲餘畝雀鼠穿窬自立勳

一葉已驚秋意蚤映階黃落更紛紛

次韻公實七月一日雨感懷

平生離落得閒多素髮驚秋奈老何賓從盤飧唯白石
意行供帳有青蘿御風獨往松三徑踏月空歸雪一蓑
短布單衣窮至骨醉吟不作飯牛歌

奕碁絕句

新秋遣悶只圍碁病不銜杯亦廢詩對局蕭然兩無語
箇中君子有爭時

鷺落寒江鴉點汀
晴窓飛電擊槃聲
方圓動靜隨機見
清簟疎簾眼倍明

再賦奕棊

荆璞玉為子井文楸作枰
有求惟別墅不喜得宣城
跼跼飛鳶墮丁丁伐木聲
破愁逢一笑無地著虧成

祇園三月雨碧澗一枰秋
試問酒中趣何如林下幽
從他著虎口尋我鎮神頭
惟悟爭先法當機與手謀

不作月采戲難禁
清晝長敢言白玉局
聊取紫羅囊角

道空傳記乘除自有方
兒童爭畫紙漫學老夫狂

嶺雲

吾居半山上繞屋猶峻嶺
舉頭即見之坐卧作牆屏
忽復不可求瀕洞雲萬頃
初疑岸谷變身不踐人境
俄頃如故常突兀在屋頂
隱見須臾間變態莫記省
煙霞成痼疾終日常炯炯
蚤閱金丹訣未辨卜竈井
世亂一丘壑斯志或可逞
鳴猿落空岵翥鶴颺晴影
石泉漱芳潤草木皆秀整
洞天有歸路未往心已領

從寶峯長老惟足求貓頭筍

不識貓頭筍還思馬祖山
庭蘭生舊茁棚錦換新班
韞玉爭懷寶登盤想飫餐
分甘須賸斲遠助一瓢簞

十月十五日山中下視雲氣自山椒出已而瀰漫咫尺不辨崑谷戲成五言

一歲下元日千山小雪天
雲層生遠壑雨滄割平川
放牧虛橫吹樵蘇樂靜眠
遙知載酒客無路到齋前

南城鄧氏亭

小麥青青山一曲江南千里傷春日
旰母江頭喚渡人
遙指麻源第三谷裏鹽包飯各怱怱
回首煙霞棲觀中
詩成更覓羊何和猶是前身內史公

遊麻姑山仙都觀

泥露出南郭遵塗盼西嶺幽尋不憚遠
陟巘造殊境懸瀑瀉天路高齋跨參井
麻姑固神人上下凌倒景速駕不容追
遺蹤搏塵影仙壇獨巋然蘚蝕此山頂
古屋鳴鶴鷗汙池浴蛙黽葛顏有異聞
源委邈難省空餘豐碑

子歛若猊驥騁永言賞心遇所樂塵霧屏濯纓欲自孔
斷鼻還思郢安得斯人徒置論挈裘領聖真豈遠而炯
炯金在鑛九洲采明月七返閱神鼎至道如可求汲深
願脩綆

靜思院上元日

欲趨嚴蹕萬重山且酌清尊慶改元稽事何時消劔戟
賢書不用到丘園傷心華屋燈如晝觸眼荒塗犬吠昏
今日江東須管仲可憐窮竄尚遊魂

雲漢院

水竹依山住煙霞並舍分
愁添中夜雨冷浸一溪雲
滿目干戈地關心鳥獸羣
歸途如可問猛犬莫信猜

二月十二日偶成

金谿東行二十里高即登山
下臨水亂山中斷水橫流
水際招提對山起丹青像
沒半泥塗野僧一飯無鐘
魚散策閒尋筍蕨芽密林
時逢桃李花

代簡呈信州李使

萬斛誰能破客愁一尊風味乏醇醪中丞自許憐漁父
高上無端住督郵不使索郎頻有顧也知歡伯解消憂
蘇州刺史詩盈卷還憶山僧冷病不

次韻和古田縣丞方景南見惠詩

疎慵我似海鷗閒文采君如霧豹斑不省流離思樂土
深知鄉往愧高山低飛乳燕聲相接小叩華鯨夢亦還
共看圍碁欲終日忘年初在立譚間

遊石鼓山湧泉院

昔聞石鼓鳴今作石鼓遊擊拊久已息甲兵殊未休精
廬莊嚴海百室雲霧浮維時當長夏蕭颯如涼秋高崖
不見日老木枝相繆靈泉發嵌竇下注千仞溝向來經
行人頗以名字留俯仰百年內磨鐫遍崑幽石橋可坐
卧清絕無等儔衆山合沓來響答相獻酬雖逢會心欣
未弭當世憂不知稽山上復有勝處不六飛尚東巡狐
兔穴中州戈鋌塞河洛冠蓋集閩甌墮此吠雪國烈火
爛不收炎颺方焚輪赫曦欲停翰微生類焦穀茲焉得

依投一乘凌風翰濯纓天漢流

石湖院

古木參天水一溝潮來曲折可藏舟
招提密映晴嵐起
滄海潛通夜氣浮
丹荔薦盤驚北客
青罍供饌識炎州
卻疑江左知名士
不作乘桴浩蕩游

玉女峯

玉女何時見茲峯獨挺羣
古容餘佛座虛室但爐熏
林
隱投壺電山藏出岫雲
自慚非屈宋欲賦不成文

初食生荔枝

六月寓閩山初逢荔子丹
皺紅分顆顆凝白作團團
品目誠無限珍甘擬亦難
不勞走馬使安坐得加餐

獨擅東南美誰如十八孃
笑顰俱有味朱粉不迷香
璀璨生掌清冷露入囊風
流須第一飮座每難忘

戲次韻和了信上座

天公下觀戲魚龍分披敦
物隳岱宗塵沙欲枯罔嚮
眼酒醴難澆磊塊胸會稽
之南曰閩海東行萬里因
雄風

二兒得邑古長樂意擬分治三山中門張雀羅即我室
弔影不識求羊蹤擔簦挾卷者誰氏捉筆言詩有此公
紛紛道傍皆杏李辛酸交攻無復理入林初聞蒼荀香
知味自覺醍醐美今時杜陵見老人他時湯休望吾子
我觀蓬壺纔一水桐柏羅浮相對起赤鳥銜符得寶書
青鳥拂簷來報喜君能無事如嬾殘吾兒儻不慙張底

次韻許子大李丞相家牡丹芍藥詩

山丹麗質冠年華復有餘容殿百花看取三春如轉影

折來一笑是生涯綺羅不妒傾城色蜂蝶難窺上相家
京國十年昏病眼可憐風雨落朝霞

座上呈師川有懷駒父

上坡諫議立清班入奉威顏咫尺天仲氏三山久憔悴
徵君五嶺亦迢遼欣逢白鶴歸華表更想黃熊出羽淵
客舍一尊雙淚落相陪里社復何年

初入浙中

松竹籠官道牛羊食野田岷山低送客蕩水遠含天乍

聽吳兒語初逢僮父船平生足未歷聊以慰華顛
山邨柿栗熟客舍稻粱秋池足能言鴨蹊多喘月牛如
聞息戰鬪贖欲起歌謳鼓楫臨江誓誰為祖豫州

立秋日上饒郡偶成

承明非厭直衰疾自投閒江漢蒸炊內盤盂嗒哈間層
冰萬里夢謁帝九重關願借搏風翼追遊物外山
平生逃暑飲病著不濡唇慰齒甘瓜冷流匙香粒勻加
餐雖意決對案已眉顰卻欲廉頗老猶為善飯人

盛彥光次韻見和復用前韻因以自歎

星織烏同織鶴閒鷗亦閒問君離俗久何事落人間末
伏秋無雨殘敲晝掩關寒泉聊洗耳清冷似吾山

涼飈將透齒烈火謝焦脣辟織梭梭應檐珠顆顆勻隱
憂成獨樂淺笑換深顰更上藐姑射問途冰雪人

曾仲共和余登滕王閣詩蓋舊詩也復次韻

西江東畔見江樓江月江風萬斛愁試聞去聲海潮應念

我為將雙淚到南州

蠟梅

見江樓下蠟梅花香撲金尊醉落霞獨倚東風如夢覺
一枝春色別人家

和曾仲共大風折木歌

疾風岌岌土囊口陽崖中裂陰崖吼南山喬木大百圍
頃刻剪伐如斷白脩枝偃蹇擲龍蛇直幹崩山塞崑岫
干雲蔽日掃地空掣電奔霆翻覆手山靈掩泣惋惜深
匠石含悲涕洟久折臂而公黥而王精金當鎔玉當剖

斷木剝為浮海航路指銀河上牛斗委餘猶得宮殿材
瑣細亦蒙梁棟取萬斛之舟可勿論大厦帡幪此焉有
狂飈卷空欲奚為壽被金石長不朽天生大材將有用
乖逢相因孰先後嗟爾乾楓與枯柳摧折為薪尚誰咎

遷居

從官三十載故山凡幾歸昔歸尚有屋再歸已傾敝今
歸但喬木竹落荆薪扉上為烏鳥都下為犬雞棲相從
東北隅三畝以為基積塊與運甓實窪而培畀成茲道

傍舍空我橐中貨堂室敢即安戶牖適所宜嘉樹三四
株當窓發華滋馨香入懷袖似與遷徙期我今六十老
豈不知前非咨謀愚見拾就列筋力微竊食奉祠祿永
負伐檀詩松楸幸在望鄰曲不見遺苔巾隨里社庶以
保期頤

竹谿集

李彌遜字似之蘇州吳縣人登大觀二年進士第調
單州司戶政和間累官起居郎以封事剴切貶知廬

山縣改奉嵩山祠靖康元年召為衛尉少卿紹興七年遷起居郎自貶後二十餘年復居是職直前論事鯁切如初時秦檜秉政決策和金彌遜力爭之因是落職退居十餘年常憂國無怨懟意紹興二十三年卒高宗思其忠節詔復敷文閣待制有竹谿詩集十卷

同天隱少章遊嵩山懷元明

秦公我輩士蚤踏翰墨場萬言若投石十年猶枯囊苦

欲泛江海有親在高堂
牢落京華春門無一壺漿
長鞭策瘦馬送我古道傍
憐我值險艱赤心寫摧傷
鏗鏘五字句勢與鵬鷄翔
感此坐矯首星星鬢成蒼
西風小搖落雨洗煙嵐光
嶂曉露孤秀野陰棲暗芳
更攜鮑謝流履盡千巖
霜搜奇得幽深訪古到渺茫
月落潭影空清吟殊未央
緬懷紫芝宇百憂繞迴腸
三歎已晡食十起中夜牀
雲埋長安日魂夢不敢驤
茂苑富山水結廬余所嘗
我欲放船下卜鄰俯滄浪
耦耕種秫田共埽三逕

荒頭白青山裏長歌樂歲觴

承天寺

宿雨洗蒼骨峯巒發新秀尋幽躡奇蹤騰踏衆山圍層
林鎖巖隈突兀見危構空高望浮黎靜聖逼靈鷲我來
風雨秋白露欲昏晝但聞百川赴鳴玉瀉寒竇岳示闕
嶮峨路絕不得筇攀援仰脇息坐石俯長溜帶露摘山
芎披榛覓仙耐山光晚逾清雲壑若相授終期爛漫遊
陽鳥欲回喙更約十日留之子緩蹄鞚

法王東庵

吾宗丘壑資耿耿抱幽獨結構祇洎家縈迴轉巖腹前
川布黃金合嶂來蒼玉步出覺華天乘凌眩生目雲間
起層林林際懸高屋斷砌滴疎泉微蹤隱深木堂空貝
葉昏苔盛半堦綠朱幡久不來哀猿響秋谷

五松寺

秋風吹客衣去路倚天碧躋攀一何苦政坐愛山癖人
言五松下曾是瞿曇宅至今梧竹陰列屋棲禪寂塵纓

得暫解俗駕聊可息怡顏巖間樹洗耳泉上石孤雲共
還往窈窕去無迹道人粲慧流獨步少林席客來了不
言碧眼照庭柏希聲出鐘梵妙意生牆壁寒灰暗青燈
偶坐遂終夕歸來人境空缺月挂山額

次韻仲輔山中之作

崖陰坐清暝目為山光注妙意不可名悠然與心晤疎
泉石中鳴落葉衣上住冷風起虛籟還向無中去三生
聽鐘魚偶失來時步佛屋倚秋風團團兩桂樹卻疑此

境中曾是經行處

碧霄泉

山根出清泉云自九天落風潮帶江腥天黑魚龍泊何
當寸雲敷一灑徧寥廓滄浪勿復歌吾纓久已濯

秋居雜詠

青春背我去白日不吾謀霜飈驚草木寒威戒衣裘寓
形復幾時四序忽一周世路伏劔戟中懷孕螟螽營營
事長久頽齡如置郵丘園儻未卜悟悅心自休

窮秋雜花遠卷此霜下傑明金委珞瓔寶璐綴環玦依
依風遞蘭皓皓日穿雪若無天冶姿不受衆目悅銜觴
泛其英攬之腸為結誰能踵高門持以浣中熱

公園十畝餘日涉亦成趣浮陰未全收晴沙已勝步杖
藜相與行童稚雜冠屨枯魚泳微瀾悴菊飲晞露欣物
各有時撫懷偶軒慮安得三逕餘誅茅種瓜芋

晞陽軒

山高竹柏陰得之近亭午茲軒揖朝曦精色快先覩濛

濛勒花春十日九風雨羲和為反旆照我衣上縷眩然
九陽遊誰云在環堵

次韻明甫西園之什

莫作原上紅寧為徑中綠多花心蚤彫依依不如竹一
枝寄他林翛然傲華屋瞋飢飯秋英借健膏石斛坐斷
百嬾身無心問雞足

暇日約諸友生飯於石泉以講居貧之策樞密
富丈欣然肯顧賓至者七人次方得順和貧士

韻人賦一章

崔嵬孔明柏結陰衆所依移根天衢上曾撫日月暉如
何去大廈卻繞烏鵲飛終當煩萬牛挽取廊廟歸鄭公
澤既遠何以慰調飢公其踵前脩一洗貧士悲

歲戊戌秋舟行宿泗間有持小石售於市者取
而視之其大可置掌握峯巒鬱然若巖竇澗壑
水落月吐雲影渺冥若遠若近皆有自然之勢
乃以千金購之而為之名曰羣玉峯曰水月巖

曰逢岑曰碧澗置諸座隅卧與之對且余少時
南遊匡廬升紫霄以瞰九江東沿洙泗登泰山而
徜徉大伾道鄴歷趙及燕而還今年責官羅城
當走蜀問山於蜀人馮濟川每至佳處耳傾心
受恨不能一日千里也繼改命不得往遂自鄭
適洛以窮隋洧兩河之源歷覽二室之趣方將
踰淮浮江自放於世猶念深山大澤不能與有
足者皆至偶於圖畫對之未嘗不慨然興懷今

一旦得是數山坐眺四方之勝豈不幸歟吾將
寓形其間而與之俯仰上下不知我之在丘壑
丘壑之在我也好事者將以余為過耶姑從而
為之辭

羣玉峯

五城十二樓高下聳寒玉天空開翠微不受塵土觸半
生嗟環轅萬事驚轉轂寄語山中人為占一峯綠

水月巖

明泉落巖隈，滿月挂山額。
疎星澹河漢，下與水光白。
了然心境空，炯炯照真宅。
鴻鳴夜更清，欲卧已終夕。

逢岑

宿雨洗空闊，出此方寸岑。
聯綿翠光浮，妙巧不可尋。
飛雲去未返，慰我千里心。
誰為具徽絃，有酒聊自斟。

碧澗

蒼崖高鬱盤，下有千仞傾。
當時捐珮母，寄此瑯琮聲。
坐石風露晚，心與秋月明。
滄浪若可濯，似負冠上纓。

宿揚州城外

舟行遠城郭缺月疎林杪窈窕一溪深微茫衆星小忘
言對詩書適意親魚鳥幸此絕紛華行歌閱昏曉

和少章喜晴

日暮馬行疾峯巒過眼頻雨堦長苦夜晴谷似逢春風
月起歸恨江天思故人機心渾已盡惟有白頭新

發光林寺

朝發光林寺崎嶇渡復攀
振衣緣翠溼側足下蒼頑急

雨欲平澗斷雲時見山祇應超勝地
行路不知艱

久雨阻遊昭亭有作

浪迹隨方寄窮途觸事諳
雨逢春甲子江滿地東南客
鬢霜前落詩情酒外酣
上方愁獨往藜杖許同參

琴溪

竹色千鍾靜溪光一鑑開
巖隈宿風雨人迹老莓苔
控鯉定何在騎鯨今不來
空餘泉上月與我共徘徊

春日雜詠

春到陵陽市人家泊翠微南亨甘入筋北戶暖生衣花
暗昭亭寺魚肥句水磯樂遊須結社倒著接羅歸

幽棲足春事晴日苦相催屐齒穿沙穩筇鬚礙竹回光
風初轉蕙殘雪欲欺梅自是經過少柴門日日開

役役炎涼態悠悠道路賒情懷知老大夢幻閱紛華攬
思雲邊樹供愁雨外花生涯書一束到處即為家

二月忽已破一春強半過提壺工喚客布穀巧當歌得
酒先愁盡惜花翻恨多逢辰不為樂明日復如何

蚤入昭亭與同遊散步山中自樵徑至水濱路
窮還僧舍飯

散策春岡曉樵蘇一徑長鈎衣藤挂石斷路水浮塘山
靜竹生韻池清蘭自香禪房得深憩魚鼓正鳴廊

再遊龍潭

密霧開深徑幽奇得重行水光沈樹色人語亂泉聲仙
去山容寂龍遊雨陣輕誰能築雲室千古共淒清

池亭待月

輕雷不成雨風砌旋捲牀山亂雲行曲樓高月路長柴
門非故國戎馬尚他鄉笳鼓悲清暝關河思不忘

散策

散策北岡路牛羊歸徑深水窮人小立山靜客微吟點
點稻花雨團團榕葉陰田翁罷爭席明日共幽尋

次韻曾德明司理留題西山兼簡蘇宰

層軒無礙石支徑曲穿林竹密催山暮松搖亂客吟琴
書虛室冷鐘鼓淨坊深誰謂溪坡遠能來杜與岑

夏日與妙現老堂二公晚步江皋露坐月下夜
分乃歸

胡牀興不淺未肯庾公賢山意知秋近江聲到寺前夜
涼新病後月色正愁邊可惜江南夢青燈照不眠

贈別竹西王彥升居士

參軍四壁生秋草鬢毛不似心已老終隨煙霞學巢由
一室安能事除埽竹西舊說青雲客詩思長留意無極
塵埃不見襄陽山賴有斯人吐消息赤心照日青眼明

與君一見輸生平君去摩天學孤鳳我今飲海盤長鯨
雲車輶兮風馬休呼兒乞取千金裘明朝有句道不得
黃葉滿庭無限秋

行路難

江心蟠石蒼虬立山激江流浪頭急風昏月暗魚龍愁
電掣雲奔鬼神入船頭星斗天為低夜潮生寒洲渚移
鳴舷鼓柁驚楚子危檣遠纜號吳兒篙師咄咄自相語
明朝扁舟繫何許半月江行十日風寸步家山隔秦楚

黃衫年少金雕鞍日高華屋春夢殘插花走馬咸陽道
世上空嗟行路難

歲後三日與羅叔共二邵似表弟席上分梅花
年後多韻得多字刻燭成

春風一夜如鳴鼉殘香暗粉驚辭柯新春三日駒隙過
花前百罰寧辭多男兒莫遣兩鬢皤舉觴不飲理則那
酒酣不用吳姬歌短鬚尚足供吟哦坐中鮑謝偕陰何
語如韶濩參鳴珂鏗鏘入耳痊沈疴豈獨使我衰顏配

我今官閒得婆娑遲明更上梅花坡

虞仲通判以溪聲名軒約同賦

山根出泉瀉鳴玉上有蒼崖擎佛屋無風水石自撞觸
不盡潮音發寒谷宰官豈是雲間陸舊識南泉生處熟
當軒大榜與名目平地重翻偃溪曲曲中時轉三妙語
一一聲音譚佛祖喧豗噫視十方鼓萬壑風雷送煙雨
此聲不屬聞中取六鑿相攘竟誰主後來紛紛何足數
五乳峯頭曾賺舉山翁有耳百不聞團蒲曲几窮朝昏

何時沿溪掬寒綠埽葉煎茶睡初足

客誦故人劉立道梅花詩有懷用其韻以寄之
桑柘如錢柳如雪南邨北邨欲蠶月老翁飯飽摩腹行
白鷗自隨閒換鐵攀花正恨顏色乾哦公七言毛骨寒
惜花不似愛詩苦即遣愁海回狂瀾公今為郎尚黑髮
仕路不應嗟歇滅江國官閒來鴈多莫使故人書斷絕
春風步馬芳蘭皋思如哀鴻獨求曹幾時懷抱相對盡
桂漿酌斗供詩豪

遊龍潭

秦山破碎天上來，女媧仙去空崔嵬。
中懸鳴玉二千尺，下有百仞青銅開。
居龍變化出嘘吸，雨暗雲昏鬼神入。
我來坐石秋水間，雲影扶疎落空濕。
浮丘容成不可俟，摩娑青壁著名字。
兩翁下遊會有時，訪我鍾陵五松寺。
次韻碩夫池亭賞蓮

胡牀麈尾揮長柄，風和入座花容靚。
乍開還合晚照中，脩竹佳人倚春暝。
此間此景樂最深，世路好惡君酌斟。

下車何必笑馮婦投杼未免疑曾參江山信美來者稀
淵明獨與田父違誰云寧食艾三斗不如杯行莫停手
黎道人自長沙入閩解后見之論易頗有所得
自言居醴陵山中有田廬養魚種竹可以卒歲
作取足庵義方堂優游其間藏書教子甚樂也
遽還求詩贈之

兩腳不踏咸陽塵兩眼不逐瀟湘春胸中乾坤照萬古
竒偶縱橫何足數閉門有竹食有魚遺子有田家有書

一生可了心自足世上紛紛謾榮辱

山行遇雨

滄溟四乾青虬立
碧雲摩霄高葉爰
六丁夜挽天河傾
石骨無塵露蒼濕
長風吹雨不成絲
飛鞚衝山帶煙入
羲和回馭還青冥
布穀催耕喚春急

獨宿昭亭山寺

山寒六月飛霜雪
樓殿夜深鐘鼓歇
琅玕無風萬戟閒
屋角明河挂天闕
龍牙七尺玉壺冰
炯炯神清夢不成

可憐幽絕無人共卧看雲頭壁月生

與公序避暑石盞方書欲寢聞林間禽鳴甚樂

因得小詩云

一林啼鳥知名應怪山翁此地行化蝶與周俱是夢
潛魚知我久忘情胸中丘壑真餘事世上功名畏後生
但得盈尊供自酌何妨人境卧淵明

春近風日漸佳與似表弟開小戶縱步後庭

圍爐人散長寒煤暖日還催墜戶開春近郊原思夢蝶

雪殘池館見真梅客愁宛轉凌雙鬢歲律侵尋寄一杯
試繞小欄尋翠甲履痕猶占舊蒼苔

雲門道中晚步

層林疊巘暗東西山轉江回路更迷望與遊雲奔落日
步隨流水赴前溪樵歸野燒孤煙盡牛卧春犁小麥低
獨繞輞川圖畫裏醉扶黃髮杖青藜

渡橫溪

百尺滄浪兩岸沙肩輿徒步步欹斜溪聲猶帶夜來雨

山色漸分雲外霞，岸曲斷林開鳥道。
水邊疎竹近人家，塵埃何處尋真境。
試逐寒流認落花。

次韻學士兄富陽道中

長江送客靜波瀾，路入回溪第一灣。
石瀨橫陳潮力減，風檣圍轉鰲聲閒。
驅除方寸無窮事，領畧平生未識山。
自笑疎慵似中散，政宜寥落水雲間。

訪雪峯真歇禪師

紅塵白髮不相投，來就僧房借版頭。
大士法中龍象貴，

老翁心外水雲浮，長蘆江靜千山月。枯木巖寒一葉秋，別後相逢重著語。牧童橫笛倒騎牛。

次韻錢申伯山堂之詠

淨坊秋色老蒼顏，檐額飛雲細可攀。客夢偶隨疎雨斷，僧遊長帶暮鐘還。似聞遺錫藏銀地，親見高人住土山。愁絕寒江歸去路，亂峯青處望雙鬟。

和錢申伯遊東山聖泉

偶脫塵中一夢闌，欲窮幽事徧尋山。靜憐人境雜蟲擾。

老愜僧窓枕簟閒十里秋香隨屐齒四更山月上簾顏
登臨物色催詩興未信天於我輩慳

初到連江和林公晞先輩

投老身名信陸沈空將白髮寄遙岑賦詩未敢師彭澤
抱甕真堪友漢陰江面飛橋誇壯麗山腰卧石閔幽深
公才清絕參竒觀慰我長年去國心

和陳穎仲題劉鞠祠

山繞平湖綠四邊兩翁遺澤到今傳蘋風引釣魚隨艇

穀雨催耕水拍田
敗壁丹青悲落日
荒庭紳笏想流年
桐鄉不廢春秋祀
簫鼓雞豚久更虔

和穎仲山行即事

平蕪新綠占封圻
橫路遊絲網落暉
山徑人稀藏窈窕
禪扉春盡老芳菲
緩行照水知魚樂
隨意穿花見蝶飛
二子昇籃今夜月
龍鍾猶勝杖藜歸

暇日遊石門用前韻

曉御欲隨風腳來
報晴烏鵲入檐催
松幢竹蓋寶坊近

石壁雲關塵境回山氣得春濃勝酒花光帶月冷過梅
卻收眼力尋歸路惜取餘青莫浪開

久雨

榕根敗屋兩三椽客徑無人老更便地近東南多澤國
霖逢甲子少豐年徑須酣飲六十日安用取禾三百塵
待得雲頭風力健梅花如雪月初圓

德甫知丞過筠莊谿亭為待月之會戲呈席上
諸友

載酒何人過子雲傳呼雞犬亦驚奔門無車馬苔侵逕
坐近池臺竹覆尊好月邀人留晚照疾雷催雨過前邨
獨醒楚子真多事共醉愚溪百尺渾

自連江赴守鄱陽黃原道中作

海角三年一夢成北來重聽偃溪聲凝雲帶雨留愁住
茂樹隨山送客行秔稻沿崖畦上下茅茨枕谷路縱橫
莫從馬腹消雙髻此地真堪老此生

舟中對月

悠悠逐隊寄舟車與世真成一夢蘧苦憶曉更鼉報鼓
喜逢秋遠鴈橫書江山似與詩人助水月應知靜者如
投老得隨歸處樂獨醒尤笑楚三閭

留別傅才孺

壯歲追隨鬢已蒼誰將勲業問行藏憐公錯莫雞羣鶴
顧我凌兢虎質羊敗柳亦工喧暮雨寒花直欲膩秋霜
更謀濁酒窮清夜明日山深木葉黃

再用葉碩夫韻

一丘一壑半生中，旁舍小兒今老翁。
歸來賦就晚逕綠，醉時歌罷春燈紅。
壯心欲盡孤雲薄，昨夢不留寒月空。
茗盃粥盃能事畢，四三朝暮付狙公。

題福唐郡園清閔亭

公餘自種南堦竹，好事風流今未聞。
但得七賢來結友，何須千畝比封君。
風梢不定微藏日，雨葉初乾薄帶雲。
自是甘棠人愛惜，不憂寒谷遇樵斤。

五言

醉帽迎風落春衣映日斜花梢藏密路隱約見山家
白玉千株暗青雲一徑斜從來少車馬恐是阿環家

遊梅坡席上雜酬

風約疎梅蘸石泉山涵弱柳借厨煙竹籬茅屋傾尊酒
坐看銀鈎上晚川

次韻學士兄秋初

何日刀頭水石間婆婆猶得一官閒杖藜蚤晚尋幽處
望斷秋空不見山

次韻林仲和筠莊

疊疊重重兩岸山，鈎連秀色上琅玕。
孤亭四壁面煙雨，人與白鷗分暮寒。


題趙幹江行雪圖

瓜步西頭水拍天，白鷗波上寄長年。
箇中認得江南手，十里黃蘆雪打船。

次韻郎中弟見寄

筠溪岸上千竿竹，夢想猶疑玉筍斑。
只欠吾家小居士。

杖藜風雨亦來還



宋百家詩存卷十三

欽定四庫全書

集部

宋百家詩存卷十四

詳校官監察御史臣孫家賢

主事銜臣徐以坤覆勘

總校官庶吉士臣倉聖脉

校對官中書臣方大川

謄錄監生臣朱紱

欽定四庫全書

宋百家詩存卷十四

嘉善曹庭棟編

松隱集

曹勛字公顯陽翟人宣和中以父組恩補承信郎特
命赴進士廷試賜甲科靖康初為閤門宣贊舍人兩
宮北行勛隨太上至燕山間道遁歸出御札可使即
真來捄父母之語勛議募死士航海入金東京迎太

上執政難之後使迎梓宮至金地名春水引對開先
殿勛伏地反覆宣諭乃得請并奉韋太后以歸拜昭
信軍節度使加太尉請祠居天台山卒贈少保諡忠
靖有松隱集四十卷

補樂府十篇 并序

夫小雅廢而頌聲寢王澤竭而詩不作何則
治亂之迹殊而哀樂之情變也故簫韶歌虞
鳥獸率舞靡靡歌桀淫酒流化是知吟詠情

罔畧以利民也

罔兮畧兮惟田漁時兮食兮民之須以享以祀兮燔祭
有餘

一章章三句

帝神農氏之樂歌

豐年報帝功也

豐年告成百穀用登匏籩既盈黍稷既馨昭假是膺

一章章五句

一章章九句

帝高辛氏之樂歌

六英草木暢茂而被其光華也

時雨濛濛自西及東日月所至罔不率從田有黍稷原
有榛栗尊卑秩秩民有家室惟天沖沖惟天崇崇允執
厥中臻於大同

三章章四句

帝陶唐氏之樂歌

咸池德施周普而流於罔極也

鴻惟烈祖啓迪後人皇皇上帝俾予字民民協平康帝
命式臧宅彼陶唐光於萬方萬方億寧亦莫我敢承如
天之運如日之升孰知其極兮不可得而名不可得而
稱

三章二章章四句一章章六句

帝有虞氏之樂歌

大韶能紹帝堯之德而同於無為也

草木繁蕪兮陰雨膏之百穀豐衍兮寒暑成之萬物護
理兮元凱馴之顧否德之弗類兮敢不允躬以承之庶
揖讓以救爭兮傳諸罔極世不乏聖兮惟皇與直俾帝
堯之至公兮終維斗之不忒

三章章四句

夏后氏之樂歌

大夏美其功利之大而民歌樂之也

於皇上聖臨御有赫洪流湯湯弗降弗辟命於帝庭纂

服是膺隨山濬川海寓攸寧五服既宅貢有常職恩覃遐荒惟帝之力玄圭告功敢不承式地平天成垂休罔極

三章二章章四句一章章八句

有商氏之樂歌

大濩美其寧亂救民而能覆護之也

維天有光式彼大商俾正以爾萬方萬方其乂易亂為治至於上下鳥獸草木罔不安遂帝命是膺聖政日新

佑我烈祖以克相爾後人

三章一章章三句二章章四句

琴操 并序

唐韓愈依古述琴操十篇詞存而義不復槩
見又聲譜僅可傳其髣髴而莫知其由是故
悲思怨刺抑揚折中皆不切其旨夫所謂操
者言其志節之不可以變而衆人之莫吾知
而一歸於時命將感激以自傷寄之於音聲

者也。大抵皆聖賢憤懣之所為作也。今依韓愈先後之次復述十首各冠其事於首篇云

爾

將歸操

孔子之趙聞殺鳴犢作

水之深兮可以方舟人之非兮不可以同游斯人斯遊
吾心之憂

猗蘭操

孔子傷不逢時作

猗嗟蘭兮其葉萋萋兮猗嗟蘭兮其香披披兮胡為乎
生茲幽谷兮不同雲雨之施紛霜雪之委集兮其茂茂
而自持猗嗟蘭兮

龜山操

孔子以季桓子受齊女樂諫之不從因以去魯望龜山
而作

龜之卉兮萋萋龜之雲兮霏霏余之行兮遲遲龜兮龜

兮魯之所依匪顛匪危兮靡扶靡持余之行兮余心其悲

越裳操

周公思文武之勤勞傷時君之德不能致越裳之臣而作也

彼雲雨兮曾莫之私黍稷繁蕪兮草木其宜田野不辟兮其誰荒之遠人之思兮其誰來之其勤其施惟先君之思

拘幽操

文王拘羑里所為作也

風入我室兮霜入我衣言不敢發兮聲不敢悲惟皇考
有訓兮余罪之歸余心耿耿兮其知者為誰

岐山操

周公患時黷武思太王之德所為作也

幽之土兮民之所宜幽之居兮民之所依予何為兮尸
之我將全汝兮之岐之陽汝其保寧兮無越汝疆斯歸

斯祖兮其誰之將嗟今之人兮何思何傷

履霜操

尹吉甫子為後母見逐晨行太山下感帝舜之事所為
作也

皇之車兮僕夫馳之皇之輿兮僕夫乘之沈沈廣宇兮
燕省安之晨羞夕饒誰其視之親不我思兮我寧不悲
皚皚繁霜兒則履之父兮母兮兒知兒非

雉朝飛操

牧犢子行年七十無妻見雉雙飛感之而作

雉兮朝飛鳴聲相隨朝刷其羽兮夕哺其兒雖有風雨
兮莫或仳離嗟余之人兮曾莫汝為

別鶴操

商陵穆子取妻五年無子父母欲其改取其妻聞之中
夜悲嘯穆子感之而作

明月皎皎兮霜風淒淒摧雲翼兮天之涯望昆丘之路
兮不可以同歸子其棄予兮予將疇依月皎皎兮風淒

淒

殘形操

曾子夢狸不見其首感之而作

狸之文兮蔚乎其成章身之孔昭兮而其智之不揚維
元首之昧昧兮而股肱孰為其良吁嗟乎狸之祥兮非
吾之傷兮其誰為傷

隴頭吟

烏落黃雲塞草秋隴頭之水東西流水聲嗚咽嗚啾啾

馬聞思舊擁人聞思舊丘年年征戰無時休無時休誰
能到此求封侯

待旦吟

纏綿冰雪陰風寒松竹半死相摧殘巖居谷飲蔽荆棘
藤蘿委地難躋攀猛虎志大自羈束易飽不及狐兔安
雞鳴起舞亦漫興扣角辛苦真可歎堯禹既往小白死
烏乎吾道何由還幽憂展轉不成卧安得日出開重關

長夜吟 并序

昔魏公子信陵君招賢下士救垂亡之趙挫
虎狼之秦連諸侯之師西嚮以報秦人固守
鼠伏而不敢出安釐王畏公子之賢遂罷公
子兵公子恐近禍因與賓客為長夜之飲余
悲公子之志作長夜吟以申之

智士名不足愚夫樂有餘況復冬夜長風雪迷通衢美
人邀我飲清酒開玉壺明眸艷紅燭流盼光四隅紫風
轉脩袂逸響緣綺疏龍香滿珠閣蘭氣生羅襦遺簪復

墮珥笑語相迎扶回頭問公子不醉將何如

長吟續短吟

桐花葉密春風老長門路暗迷芳草螢燭流輝露濕光
蟾蜍景落莎雞曉金烏出谷上蟠桃別院笙簫歌未了
九華煙滿醉楊妃樊姬靜聽雞聲悄舊人直莫妒新人
別有蛾眉更妍巧

漢宮歌

漢家離宮三百所高卷珠簾沸簫鼓車如流水馬如龍

蘭麝飄香入煙雨通衢夾道起青樓金馬銅駝對公府
五侯同日拜新恩七貴分封列茅土玉窓朱戶盡揮娟
絲竹聲中喧笑語玳筵珠翠照尊壘繼燭臨芳醉歌舞
醉歌舞醉歌舞天長地久無今古

迷樓歌

項昇出南國技巧多淫思草圖獻天子賞激嘉宏規瑰
林蔽江海斤運成風雷千人扶一棟萬棟高巍巍飛鴻
歷層檐雲雨生堦墀五采間金玉百和雜塗泥仙葩粲

楹棋七寶裝雲楣一房百家產萬戶羅東西龍綃開寶
幄簾幕垂珠璣光景艷流目樓閣低天維笙簫動虛籟
絃管明歌姬撞鐘擊鼓恣行樂牙檣錦纜環江隄天長
地久有時盡君王此樂無時衰詎知變故起倉卒不悟
人迷樓不迷

吳歌

水滿長洲月滿樓姑蘇臺榭鏤深秋君王不見春花老
響屨廊中有勝遊

三婦艷歌

大婦雙綺襦中婦紅羅裾小婦服翡翠理曲調笙竽良
人幸安坐美酒傾玉壺

大婦織雲錦中婦繡鴛鴦小婦獨無事對鏡理紅妝良
人幸安坐帳暖自添香

團扇歌

白露溥玉階秋風動羅幕御幸各有宜非為君恩薄紫
殿香風暖珠簾壁月斜閣中調寶瑟門外駐羊車

君馬黃

君馬黃臣馬蒼君馬短臣馬長馳驅不敢先騰驥左右
先後惟其良臣馬勞瘁君馬康君馬康無相忘一勞一
逸固所當君馬無逐臣馬強

日出引

雲冥冥風淒淒綺疏未白雞已啼角聲纔斷闌朱扉闌
朱扉款朝日君王劔珮朝諸侯赫赫明明光萬國

飛龍引

炎精應運開真籙神母啓啓夜潛哭五星同軌莅秦雍
十二真人翔水曲斷蛇約法授天人項籍叱咤徒驅逐
蕭曹翼翼冠元功三十一君兆開國君兮臣兮俱會同
灑掃乾坤開壽域

篋篋引

行天莫乘龍行地莫乘馬龍馬各有待牽連一時假至
人運獨照八表周神化結交當結心勢利徒夸咤兔絲
倚喬松纏綿不相舍秋風飛嚴霜榮枯何所藉富貴人

所慕貧賤人所鄙妻嫂薄蘇秦人事古如此游子歸去
來勞生良可恥

春江行

浦嶼連芳草天桃間柳隄征鴻下天際游女過前溪魚
沒驚帆影林疎見鳥啼王孫聯繡騎童子解香觴吳姬
笑留飲同指畫橋西

淮南行

人去宮門寂丹成寶鼎空砌下苔錢紫庭中霜葉紅思

君聽松籟精魄上高穹

步月謠

太空天宇清且高皎然冰鑑懸層霄絳河水淺聞風息
蟾光度景搖金黿仙人縱駕游八極鳳簫歌吹鳴嘈嘈
星宮月殿風馬遠珠華露濕旌旄閃還虛按轡窺塵寰
波裏三山銀浪卷

獨酌謠

我有一尊酒來自故人家故人久相別十載天之涯相

思不相見對月傾流霞一酌延清風清風為我開靈襟
再酌勸明月明月徘徊冷光發三酌望故人明月清風
見顏色高歌起舞賡長謔聲裂金石貫層碧伯倫已死
淵明殂螺贏螟蛉漫充塞須臾歌罷玉壺空醉覺長天
不盈尺

深夜謔

花落春猶在人存事已非草侵迎仗路塵滿舊熏衣獨
立空憐影當歌但斂眉羞見長門月曾同步輦歸

步月謠

琅玕轉景蒼虬立露脚斜飛冷光濕人歸芳草恨迢迢
劔珮生寒秋水澀離離箕斗正相望交流帳合金波入
風前搖袂思沈沈雷雲不動蛟龍蟄

山中謠

山中之樂何由說知者不言言者拙紅塵飛盡散松風
獨酌寒泉弄明月

夜夜曲

舞衣疊翡翠海月挂珊瑚香滿流蘇幄相迎問醉無

綠衣曲

春光有餘輝入水可攬結予亦澹蕩人照影空明滅

塞下曲

天聲未陽感窮髮將軍已過長城窟紅旗半卷夜歸來
馬蹄踏碎天山月

秋草黃雲塞馬肥漢家驃騎擁旌旗可能衛霍年年出
不及燕然一片碑

入塞曲

黑水迢迢黑山暮馬鳴蕭蕭夜爭度悲笳四起黃雲愁
角聲嗚咽何悠悠隴山行斷不回首一番回首添白頭

泛水曲

春服僅能試荷小未成蓮畫舫維青幄平波暮素煙暖
日熏花氣新萍點翠鈿歌吹浮天上旌旗轉座前促裝
留晚景續酒載歸船前驅戒津吏除道候江壖

楊花曲

千里萬里長安道送君思君為君老願為水底石菖蒲
不教零落同百草

美女篇

芙蓉開綠水青松映海棠新晴沐膏雨艷色明朝陽綽
約彼姝子轉盼流輝光被服妖且妍細浥薔薇香下有
合歡帶繡作雙鴛鴦上有雙同心結作明月璫珠環垂
兩耳翠鳳翹釵梁瓊鈎約雙袖提籠學採桑採桑城南
隅五馬停路傍調笑不一顧但見桑條長歸來候蠶眠

靜坐調笙簧結髮事夫婿誰羨東家王

遠遊篇

少年重意氣辭家遠行遊高譚茂卿相峻節凌九秋仗
劍謁明主挾策干諸侯衆目寶康瓠明月難暗投驂騶
困短步翻為駕馬羞虛名不足慕抗迹追浮丘至言發
深省遐覽隘九州書功佐天政美惡無不籌麾幢周四
表騎衛羅天駒簫鼓鳴清歌解駕滄浪洲金石易消朽
生死真蜉蝣

蕭史曲

玉簫散奇響真氣淒金石招攜偶冥會理愜心自適當
貴如朝華況復多得失胡不希長年鍊氣固形質高舉
凌仙翰雙飛上層碧揮手謝時人去來空役役

花月詞

花光露重春煙濕鶴去瑤臺人竚立坐見闌干月腳西
景入長門金鑠澀花開直莫媚春風春風代謝如呼吸

玉階怨

堂上臚銀釭閨中下羅幕思君度逢夕長於金井索

春日有所思

陽春被華旦草木蒙恩私沈沈幽谷蘭不得同其施女
蘿託喬松光采紛葳蕤遊塵薄雄風光景低鬱儀巖花
落深澗甘為井底泥升沈固難量寧復論高卑佳人去
已遠良遇安可期流年易彫落榮盛能幾時促席具尊
酒不醉夫何為

有所思

有所思兮天一涯彼美人兮安得知江皋送日下洲渚
心遙目斷征鴻飛蘭嗟蕙怨芳草歇春歸猶見霏霏雪
文姬著破去時衣寂寞愁看漢家月南箕北斗苦相望
綿綿此恨無時絕

邯鄲才人嫁為廝養卒婦

落葉逐驚風落花逐流水漂零無定端寄託隨所委朝
榮瑤圃中暮落窮轍裏豈不惡糟糠豈不願羅綺羅綺
閉深宮嫉妒交相靡糟糠守窮廬苦樂同終始行藏宜

自然燕巢茅屋底

反招

騁騶天下駿所制在服箱蘇秦天下辯所失戀冠裳達
人貴自重出處保龍光山花麗雲錦鳥語調絲簧清泉
激鳴琴掩抑合宮商芝朮勝梁肉蘭菊有餘芳白雲結
山友來往俱相忘世路甚谿谷簪笏誠羈韁人心若丘
山咫尺不可量猿鶴熟可馴人熟不可防留侯從赤松
范蠡辭越王二子保令終避世容何傷王孫促歸軫吾

徒方退藏

獨不見

獨不見誰相憶花影上珠簾明月穿窓隙翡翠暗無光
蒼苔點行迹鸞鑑挂珊瑚寶靨銷金碧髣髴聞簫韶夢
想見顏色為我報新人好好承恩澤君看後庭花芳菲
能幾日

烏夜啼

飢烏啞啞不肯棲雄飛呼雌鳴聲悲倡樓年少醉歌舞

幽閨思婦寂無語將軍百戰未成功坐數更籌聽金鼓

荆門道

荆門道在何許萬里迢迢入南楚故人何事未歸來滿
目豺狼路多阻路多阻兮可奈何矍鑠廉公亦奚取期
君終日醉如泥賢似靈均醒時語

蔓草長 并序

余所寓之室前有喬木一本葛蔓延幕其上
感物興懷有蔓草長以風焉

蔓草長搖風緣砌凌高堂萋萋密葉護蔥蒨溥溥湛露
滋瀼瀼下有徑寸蘭委靡塗秋霜依憑既失所不及菰
與蔣託身肯媚附喬木持芳自潔凝幽香蔓草長因緣
從爾摩蒼蒼一朝喬木落斤斧掘根削株貽汝殃

隋隄柳

隋隄柳千里夾隋隄隄中有平道百尺隄金鉞柳色間
桃李行客迷芳菲牙檣從西來雲表開龍旗一舟挽千
人萬舟若魚麗舟中盡絕色不厭荒淫飢錦帆壓奔流

日夜東南馳龍舟未及返身辱吳公泥神器失所託化
作迷樓灰向來桃與李花色猶不衰向來隄上柳柳色
猶依依唐公已舉晉陽甲草木雖小知無隋

折楊柳

去日同君過渭橋橋邊新雪未全消如今窓外楊花滿
憔悴無心約細腰

高樓月

高樓月倒景入闌干人眠綺窓影月在青雲端相攀不

可得空成簾幕寒

估客樂

朝飲文君酒莫宿邯鄲妓
近得浮梁書春前辦行計

遊仙

天河水冷煙波渺流水無聲銀浪小白榆歷歷映瑤沙
白露淒清下雲表扶疎丹桂落紅英片片紅霞散瑤草
月中桂子空傳名散在人間無處討仙翁呼童收紫芝
紫芝肥嫩光離離遺英殘萼墮無數仙鶴飲啄時鳴飛

仙人種玉耕雲隈，倚雲橫笛學鳳吹。
須臾羲御崦嵫沒，相呼拍手騎龍歸。

駕景絡絕響，遊日低陰虹。
靈光轉脩袂，羽節飄晨風。
抗手辭金母，偃蓋東華宮。
高仙發空瑤，翼響飛九重。
霞觴艷流目，疊舞歌玉童。
緣雲上虛籟，笑語鏗洪鐘。
海水屢清淺，倏忽欣再逢。
不惜暫遊詣，情款無初終。
歡餘促歸軫，攝轡翔斑龍。
投閒憩三素，保績崇真功。

僕持節朔庭，自燕山向北部落，以三分為率南。

人居其二聞南使過駢肩引頸氣哽不得語但
泣數行下或以慨歎僕每為揮涕憚見也因作
出入塞紀其事用示有志節憫國難者云

入塞

妾在靖康初邊塵濛京師城陷撞軍入掠去隨健兒忽
聞南使過羞畫廣額眉立向最高處一見興土思數上
日望回騎薦致臨風悲

出塞

聞道南使歸路從城中去豈如車上鉞猶挂歸去路引
首恐過盡馬疾忽無處吞聲送百感南望淚如雨

蚤行相州道中

安陽道上晨沖融西有雲氣成青紅四重闌干五滴水
五花競鬪相穹崇旁有臺殿峙鴟尾上有翔翥如飛龍
擎拳歎仰得未有頗似西母居其中微臣一念到彼處
仙班趨揖殊從容跪奏內人遇至道沆瀣一飲和氣充
脩然退歸復故幹神宇故便摩青空卻看向來禮謁處

但見碧落相冥濛

望太行

落月如老婦蒼蒼無顏色稍覺林影疎已見東方白一
生困塵土半世走阡陌臨老復茲遊喜見太行碧

持節回呈王樞密

去時炎歊極蒸鬱塵滿籃輿困搔兀歸時大嶺雪已飛
易水清漳醒病骨三月不親君子儒一笑且脫蕭何律
身輕頃刻渡長淮殊喜眼前無俗物

分題墨梅得客字

北風吹雲邨寂寂練練溪流湛寒碧馬頭忽有暗香來
撼雪尋芳識標格揚鞭敲鐙荒寒路酒惡難禁賴銷釋
隴上故人消息遲一枝誰寄疎煙隔老禪幻此空花相
墨暈橫斜清照客定應飛夢會仙山玉樓澹月連天白

題友人書後

客子得秋涼壯懷亦增慨永念故人遠三湘渺滄海

贈陳季野

平生聞說陳季野渠正奇奇余下下人間韻語光陸離
韞櫝藏之當待價顧我飄然離帝傍適是適非思陶寫
庶幾一笑排春溫賴有梅花尚盈把

選上人素履精修僕先識於崇信岑寂之時重
來見之作詩為贈

我初遊赤城松竹空函丈師時奉諸佛畧不乏供養茲
遊再見之譚笑益夷曠橫披慰老眼豐粟煎夜餉不以
三生緣遂作一指想新蕉展時雨風鑿鳴晝講勉旃自

愛重公才定龍象

寄空上人

華頂峯頭空侍者家在全閩九峯下后山妙香今始聞
西江一口元非假可但枯木已陽艷更喜淮碑仍續雅
天風海雨會入詩況近梅花欲盈把

送子威兄鈐兵池陽

伊昔侍伯父一官尉池陽時年方九齡讀書未知方子
今涉五紀皤然鬢眉霜茲喜伯兄官鈐兵總戎行素風

出韜畧貌貅稟閎細小試部勒勤著鞭揚榮光青林脫
幽籜濃綠棲殘芳起予水雲心尚拘朝市忙齊山上穹
碧九華儼珪璋紫巖楮敲冰雲葉供展張清江霽遠目
帆檣下滄浪林泉作佳遊為公發天藏伯父昔所臨雲
漢披天章琳琅夏鳴球往往題僧坊何當切訪問便與
磨珣蒼庶於門戶間能事歲月長仙舟涉初夏浮家及
清涼毫舉塵土境海運圖南翔兄弟各垂白語離熱中
腸願言養浩然時舉黃金觴因風託素鱗訪我菰蒲鄉

送許尉顏

平生許彥充，軀膽兩豪舉。掀髯參軍事，詎可細碎語。我
時百僚下，計拙役甚苦。從事得餘力，慷慨志相許。公乃
小著鞭，一官尉南浦。鹽車雖云困，垂楛亦其所。願子自
薦達天王，方振旅求田。勿墮氣包茅，當問楚。此事豈不
壯，况復吾素與我緣。擁纒服君欲訪雞黍，天寒霜雪盛。
世亂豺狼阻，何堪南北趨。別意寓瓊俎，傷心有清淚。揮
灑欲如雨。

別鄭康道

與公相從久未始蹈瑣細我既困索米公已安吳地一
鄜了百指與閒殆天意陛下聖而武庶物進以彙擇材
訪耆宿粲若數一二考槃出幽隱鼓篋趨朝市公尚有
遐心詎宜忽初志腰鐮與手斧甘窮幾經歲我願以公
名充庭如孔翠風雲際盛旦用激志士氣胡為條來往
老懷惜摻袂惟冀加餐飯賢者不終棄功名會有日當
看詠既醉

和鄭康道喜雪

東方已明雲海立怪來雀噪爭枝集凜氣著人不苦寒
老境增衣欲重襲忽驚朔吹翔臘白隴畝為祥時適及
稍聞清響食蠶聲漸看落檐傾粟粒縈梅閣竹巧相積
透隙穿窻莫能戢散鹽蔽空誠非虛回風作舞勢方急
歷亂瓦溝已一撇紛泊何假鮫人泣但喜彌空絮影下
不管霑衣玉塵濕谷口先生出好詞韻險致高俱足給
嘉言浩若長河注答問殊非古井汲乘時和樂致上瑞

屢豐固非一朝緝須知天門開九重布化調元密呼吸
明朝稱賀明光宮高冠長劔千官入

和李判院見貽

楚風然竹爆幽吼曉覺春雲變蒼狗慚看歷日與桃符
猶襲塵緣戀升斗先生冒雪肯過我椒觴得奉譚天口
寒素每歎濡之儒品俎常嗟非之九但喜盍簪侍誨約
涉世麤蒙一肯首五雲曾約采真遊天公見賜良不苟

和王倅見惠

惟公霄漢姿稍稍摩天翻回溪畧蹭蹬乃爾詠葵麥會
復見軒昂一笑忘羈客

有琴寫流水無言道情素水寒江海深川闊牛羊暮倒
指三十年猶記潮陽路

道遠不跬步心勤每僑如荷深露初下翠密紅亦疎是
知詩興多賸寄懷人書

僕頃將明命三往貢楛矢所期宣國威寧復賦霞綺須
知處死時與生亦相似

和仲遠新池

公有靜中趣鑿山俯清深秋風夜雨過飽聞泉石音雲
岫冷蒼翠遊萍紛浮沈心賞殊不已悠然付微吟

和錢處和扇車

君家世德肖富貴出謙受冷然禦冠車為君駐戶牖初
訝鼓清薰與客破宿酒又疑建溪風碾聲出兩肘細視
碧玉架蓮梗轉雙手遂令青田鶴奮翼揮莫後因知心
匠妙殆與造物友人生土宇內孰不涉煩垢有物能渾

成既耦不以九坐使塵沙劫熱惱如拉朽惟君韻高秀
人譽不容口述作協穆如亦莫祕關鈕願君均此施清
涼被馳走他時贊南風為佐虞舜壽

和李次仲韻

先生柱史後道價連城重火龍燎金鼎玉樓詎可凍扁
舟造交舊已奏少微動藹然義風暢舉世士莫共雪聲
灑篷背皓采耿幽夢相見忻把酒清嘯塵落棟願奉祀
橋履豈憚吏部甕六鑿方有愧一錐煩屢痛益知仁者

心新詩得頻諷

春晴野步

春風搖天宇散策喜徐步樂與二三子綠草池塘路鳩
鳴桑柘春川闊牛羊暮眷言益妍煖更約窮逸趣

聞北軍犯淮

落日慘客意老懷增百憂朔風動地吼湖水吞天流甲
馬隘兩淮殺氣橫九州無德彼將滅復讎我有休羽檄
交馳際哀歌寄清愁

登道逢閣廬山

松杉闕琳宮仙君朝帝所神風故靜默人間漫今古地
靈驅鳥雀磬聲肅壇宇倚檻夕陽間雲山認歸路

中秋前一日邀賀子忱為對月之款乃審放意
山林扁舟東去引企不已偶得小詩

積陰埽秋風吹作今夕月山嶽四高寒天地一澄徹幽
人渺何許應喜清暉發一尊不同樂孤光共愁絕

人倫僧求字

上人蚤出岷峨山頗遊五嶺崎嶇還妙定休咎指諸掌
會心不出眉宇間顧予從來多得喪歸老林泉喜無量
他年見我巖壑中應笑如如得非相

過淮值雨偶成呈王樞密

明日立秋秋色至向晚雨隨大風起飄盆如麻不足喻
倒海傾江差可擬高林老木亞復折簾幕頽垣紛若委
須臾霽色上南山落日燒雲照淮水

懷歸自訟

讀書老不入屢讀屢遺忘遇事欲強記轉首輒悵悵以
此趨事為豈但成嘲謗人豈不自知去矣殆天放

治圃

腰斧治小圃撲檄久不省妬芽盡芟除條達出秀整臨
津獲梅株蓓玉作寒炯三遠無所栽留看橫斜影

山居雜詩

卜居得幽勝景物無升沈峯巒環郭郭松竹排園林時
時破寂寥脩脩賴鳴禽於焉自有得天籟皆餘音

三伏暑可畏貧富方共之雨忽兼飄風涼與清氣隨一
餉滌炎暘萬里失蒸炊大哉天地德好生常所施

三春羣卉盛任花茂與殘好花正穠麗不作十日看蓓
嫩便須賞開時惟可歎繼自喜新綠吾心常並觀

煨室宿火銷緼袍良獨暖病身怯夜永老懷苦晝短棲
鳥驚檐頭朝日上窓眼未問粥面花地黃地須滿

侵晨盥櫛起爽氣隨涼颿曳杖踏露草不覺路已逢水
清出沙嘴煙白橫山腰致爽列羣岫不待西山招

平生文字飲真積力已久温故忽若醉卯飲不待酒昏
然亟步武快哉繞陋水閣夕陽紅雨餘羣山秀

平昔喜鰲舉未易自摧墮功名邂逅來求則成大過壯
年不艱苦老即困寒餓消長理或然要知非力可

台山穴三獸樵者不得薪忽是食人虎便有射虎人善
惡必對待禍福常相鄰采月寢三皮居山聊一欣

時有三虎

出入澗下一月
間獵人盡得之

蓬葦久不居乍歸欣故情落葉聚蛛網殘莎鬧蒼聲迹

與朝市遠夢隨風月清從此眠食間蕭散安餘生

八月河漢近涼蟾輝太清窓戶紗已薄草木風有聲所
喜暑云退不憚歲徂征招客對晚色酒與月同傾

手種亭下松偃蓋出雲外攀條喜脩榦為我發清吹曉
庭風瑟縮夜月金瑣碎種久方歸來對之顏有愧

晨粥山中行落葉響步武委曲訪隱逸清譚銷百慮老
湯淪苦茗宿火煨山芋卻照夕陽歸家人不知處

臨老看草聖作字意少快居然落筆際點畫反留礙早

意亦易事懷抱殊不介茲來每把玩徒復一歎慨

小圃藝花竹春末已繁秀土脈得鉏斲枝葉易秀茂久
以告老病未免閉圭竇相忘無芥蒂一二約親舊

北歸了無日先壠埽何時愁與燕鴻遠心同楚客悲寒
蟬咽敗柳幽鷺來清池誰與話舊事淚蘚空在衣

秋色遂將半遊雲時澹濃水光影擺紈秀色增芙蓉斲
地種三徑鉤窓來五峯新晴何以卜一意聽晨鐘

白日忽若暮北風天正寒濃陰欲釀雪雪似商量間羣

兒競喜躍婢子爭仰看命席撥瓮碧取醉期盡歡

稍稍岸上柳粼粼岸下波晴雲羃遠岫東風扇微和去
冬有耕植連春無干戈田畷知此意種秫應更多

高原收菽麥下田插禾秧田頭與地尾一一意所量躬
耕辦好怯擇種均豐荒所以終歲間食米不及糠

行都老故舊見贈新歷日快哉得過目遽然若有失已
病嗟再歲漸老念弱質歎餘落塵尾非言付搖膝

下邑常寂寞細履寒溪頭魚鰕腥斷岸橘柚明晚秋山

色儼晴碧溪光泛澄流相思故人遠應過回鴈洲

駸駸隨日老寧能間分陰波流固自遠雲在初無心鳥
聲驚幽思風徐快沖襟馬卿苦病多中懷天莫忱

雲山貯回腸日月任轉轂客居不問鄉一飽寧較粟家
釀報浮蟻溪鱗買尺玉以充朝暮槃懷抱無乃足

素懷繞列岫乃家台山麓人境兩俱絕事物濟所欲芳
醪澈瓊白茗飲淪溪綠對客調玉軫清風入梧竹

鑿池固不廣納納隘所居苟無水光寒便覺非吾廬漪

漣漾芳渚澄影浮晴虛樂哉濠梁心已復遊嘉魚
隨春動草木微和入池閣羣芳爭妍媼紅翠媚寥廓一
枝始到眼萬態俱如昨春深風雨來固已任開落

閒居必家釀不以空乏廢小槽壓春碧渾舍揖和氣三
杯禦客寒一卮款僕意寧論有聖賢且復供邨醉

小圃養春色乘時不可緩翌鉏常于于成趣須旦旦花
摘去年種喜供一時翫舉杯付歌兒野服更蕭散

隨分作欄檻松竹帶花柳四時面面看百種日日有玩

目必羣卉洗心付芳酒吾儕不改常居閒簡可久

春深多夜雨倦卧得飽聽穿林乍依微滴檐已紛競衮
寒似落寞人寂眷閒靜怡然遂高眠枕上頗適性

城居得高勝欄檻俯闌闡斂跡紅塵中遊目雉堞外湖
光浸晴碧若與雲外會漁舟何處來幾點忽隱晦

人生不如意十固常八九吾輩窮物理挺特惟所守東
風暖入律客意濃勝酒遊鞍縱所如寧能困圭竇

雲山環所臨煙景日自異山作故人接雲為久處計酒

酣一聲笛梅風四山起清香賸披拂參橫伴邛醉

曾端伯自承移師川口有懷風旨無便附信忽
領教喜成小詩附便奏呈二首

好在曾夫子寧知晤語期倚毗離楚日鼓吹入夔時赤
甲薰風近黃堂淑景遲相望邈坤軸空詠竹樓詞

某也庵居久心形付自然山林藏老退松竹養風煙遇
物元非遠尋真自有天懷人會心處熟誦見山篇

和久雨

綠漲東籬菊，桐彫古井欄。
雨頻傷蚤穀，煙冷佐新寒。
有木皆生耳，何顏得渥丹。
平章濟農事，清坐且團團。

和曾守有作

問俗猶秋熟，移牀趁晚涼。
笑譚懷酒伴，節物念吾鄉。
聞道銀槽熟，思傾玉指香。
政須圖一醉，寧復較行觴。

和王應夫見貽

況味年來薄，書音寄亦稀。
亂離多病後，人物故園非。
朝謁當年會，朋儕幾旆歸。
悲心那聽此，生理想依微。

和曾鉉父見寄

活水從澆竹間書會引眠玉溪何處所璧月共清圓詩
到惟供錄歡如不隔年何當見風度應向日華邊

久雨

一旬連夜雨人物困泥中竹樹侵書暗潢流趁路通竈
煙薪更濕檐溜耳難聰潤逼衣襟重何時日照東

贈張鍊師

昔仰蘇仙跡今瞻弄玉身岳靈朝捧劔飈馭夜朝真笙

鶴聲常近煙霞到處新願言承道蔭祕語慰斯民

題小石接待庵

老大思閒適山林喜晦藏一塵雖異縣三徑得崇崗地
僻煙雲潤年豐黍稷香心期得多矣襟袖更新涼

題今是齋

偉矣高情著齋名世亦稀但能塵事遠便覺昔年非琴
靜凝香碧神清衆妙歸諸緣只心法鷗鳥亦忘機

小三姪遠持兄嫂之命見訪於荒寒寂寞中將

歸賦詩為別

不見小阮久相看情甚溫肯來成宅相端可大吾門暖
日長江路梅花細雨邨真成好兄弟言謝卻忘言

示諸子

霜入晴雲暖冰生掠岸沙卑枝閒翦橘幽徑試尋花客
路人情薄鄉關去路賒只應託諸子莫倦問桑麻

獨步南園寄子忱

野老悲春事相如復倦遊肯來傾濁酒同與散清愁遠

岸重重柳晴江處處舟飛紅殘照晚閒倚水邊樓

淮上幕府

上將宣威重長淮朔吹來兵戎已超距鼓角有餘哀日
薄雲多暝天寒火易灰詩成且排悶興在倒金罍

遊廬山道中作

蚤踏丹楓路西風禾豆乾鳴榔秋水闊擊漂曉溪寒短
褐宜扶杖長涂懶據鞍卻思冬後景黃菊壓欄干

遊廬山涂中雜詩

去去忘回遠行行迫臘天江寒侵老淚霜冷逼宵眠客
路雖經百歸涂尚隔千家山在台岳南望幾悠然
稅駕南昌郡城頭喜少留兒時誦閒賦老境作佳遊傑
閣收英槩長江倚暮愁何人識老子清月上貂裘

苔溪道中

秋日苔溪路輕舟棹晚霞夢魂猶畏客行李乍離家細
細來涼吹娟娟有晚花平生雲水興老境似難誇

過小圃

小隱州城北先謀儋石儲幾椽將斂屋數策未看書碧
色新松徑泉聲舊石渠欣然終日過真是愛吾廬

上塘值清明

客路逢寒食划船鬧水干嬌雲易得雨暴冷不成寒白
水連天去繁桃觸目看朝來有家信稚子報平安

客路逢寒食清明未到家起居須藥餌飲食任魚蝦水
淨垂垂柳風遲艷艷花興來隨處樂不復問年華

客路逢寒食猶尋禦臘衣羣芳須暖景曠日尚寒暉餘

力求閒蚤勞生昨夢非
齊花渾似雪蝴蝶夢中歸

客路逢寒食光陰亦可驚
如何介子節再過闔廬城
列岫遙逾碧羣芳晚更明
飢餘風力壯掀舞小舟輕

客路逢寒食浙西春事稀
日華藏暖景天氣未單衣
歌擢喧椎鼓桃花巧映扉
空收麩麥粉藥病豈心違

客路逢寒食禾秧出已齊
清溪三汲淺白鷺一行低
禊飲心何在茅峯路恐迷
隨時隨有樂何處不幽棲

涂中寒食

上已當羈旅飄然浙水東
好花閒照水宿雨冷連空
靈武兵方振燕然信未通
無人訪老子有淚濕春紅

南園夜宿有懷

老病杜門久佳時誰與過
親朋懷我少風月向人多
梅影橫清夜江聲動白波
不知潮蚤晚牆外聽漁歌

謝岸老惠顯明新芽

幽壑乘春摘芳芽辱見分
鶯花妨老眼香味喜新聞
細石飛輕雪圓甌泛亂雲
雖無七盃量清興重欣欣

得致仕喜成

久甚嗟形役，今方得自怡。
所欣官已了，得與靜相期。
風月閒如舊，心情喜可知。
山中雞黍友，賀幅已先持。

招賈祕書

不見賈夫子，病懷何得陳。
呻吟一春了，物色九秋閒。
花翳欄檻秀，氣浮衣巾笑。
言約中澣雞黍，供蕭晨。

寄吳思道

別去書音短，愁來客路長。
飛魂常故國，舉目念殊鄉。
未

暇論竒字何堪別最良秋風入邊草意苦不相忘

簡冲普庵故人

寄跡臨安久思歸夕夢頻愁多難強醉病苦故禁人夜
短無清夢年高歎幻身山中有道伴雲壑擅餘春

宣召看紅木犀賜宴索詩并謝恩

九霞深借曉光披粟粟輕紅蔭碧枝不逐秋香勻菊艷
要烘花色並彤墀涼雲收雨頌慈惠寶幄中天拜宴私
折得一枝恩所賜喜如初挂綠衣時

恭題觀堂

松篁深靚隱新宮十六清真位位同笙鶴似臨三境上
珮環應下五雲中煙霞頓隔塵寰路道德追還太古風
固已羣仙資聖壽嵩呼益願祝堯聰

初到闕下

墨勅雙馳侍帝傍何堪窘步入明光退風久作翻風翼
倦客何能又客梁野寺殘僧思緩步斷橋流水憶寒香
何時短褐攜筇去數里松聲細麥岡

持節和王樞密

長淮矯首得遐觀，猶記當年獲奉鑾。
萬馬飲淮貔虎肅，六師扈蹕水雲寒。
欣瞻幕府蓮依水，慨念神州李下冠。
狼望已銷歸廟畧，更持韻語訪任安。

稍陪酬唱與榮觀，聲並琳琅和八鑾。
可但文華迎日麗，自然符采照人寒。
笑譚殊喜親犀塵，接待終慚戴鶡冠。
公等雍容瑚璉器，騫騰行見近長安。

右府登車竦聽觀，皎如玉韻叶和鑾。
清薰已解南風愠。

和氣先舒易水寒
行李喜陪金虎節
移文應闕竹皮冠
願看歸去為霖雨
天下蒼生在謝安

被旨軍前講和得回

仗節親宣詔語還
敢期幼稚得重看
鐵衣冷挂龍鱗靜
寶劍高藏玉兔寒
兵甲從今挽河水
兒孫復與誤儒冠
清閒放意山林下
老援何能更據鞍

呈時宰

時年十八

不毛山海盡梯航
德洽重熙聖祚昌
萬國鼎新周禮樂

千官星拱舜衣裳惠霑園土恩波闊德及昆蟲化日長
天地至和昭感格比聞甘露降番陽

政府生日

鉅德元功鳳應韶屏風隔坐翊昌朝星辰循軌三階正
鐘鼓重新一氣調活國工夫歸斷斷鍊形真一已飄飄
芒屨門下塵埃客拔宅惟看上紫霄

歲躔回次拱台星麟閣儀形首萬英鍾阜堂堂分秀潤
淮波滾滾湛清明鋪張治具調元化整頓皇綱撫有生

鶴馭他時赤松伴丹砂九轉待功成

林詔使生日

時以御史
募戰艦

杪冬慶閱綺雲浮挺育文英氣奪秋烏府暫煩安遠俗
龍驤方倚破奸謀三吳遂算時巡馭四海咸瞻入告猷
何止陰功鍾五福巖廊已識濟川舟

題錢參政東巖

龍顧初聞闕縱觀盡收清勝閱高寒四圍列岫飛雲靜
十里平湖碧照寬塵尾有言皆灌頂塵中無路不驚湍

東巖端作東山望行為蒼生起謝安

題人舫齋

君家作室擬虛舟想見低窓事事幽竹幹功同檣影直
簾波寒並水光浮五湖煙月應無意四海風塵計少留
挂旆天山端有待要憑巨楫濟橫流

題客舍

路邊小舍靜無泥風入松杉綠滿枝溪抱短隄山抱屋
舟藏曲港竹藏籬主人野性留應懶倦客閒情去輒遲

內訟塵埃猶僕僕厚顏如奉北山移

賦陳嘉謨東西軒

田田東作襯柴關濕碧吹青一望間已許傾心常向日
尚容高卧且懷山光風春動方崇蕙沆瀣宵零可駐顏
要是耕耘在毛墨圖書佳客樂餘閒

西成高鑿一軒通荷蓋吹涼入坐中新月不妨回夜色
有秋何止閱年豐直須落日紅無際賸看羣山翠埽空
更約他年身退後披襟來此揖涼風

詠雙竹

千巖萬壑碧嶙峋，密有雙成瑞此君。
破籜猗猗聯綠玉，並梢嫋嫋舞清薰。
巧穿怪石嵌空地，色映虛亭窈窕雲。
比節合心皆美事，孤高殊喜不同羣。

贈許察院

海內知名第一流，詩從偉度破優柔。
知公少駐搏風翼，念我都如露地牛。
解臘天容先布暖，得春梅意小遲留。
紅穿碧甲聊隨俗，不奈心驚鴈過樓。

潮州贈劉大夫

山繞蒙庵十里陰
兩翁逸駕每駸駸
人隨衡鴈野雲薄
夢繞鱣溪秋水深
別後詩章清有思
向來遊處曠關心
何妨一笑雲蘿上
小約湖邊特特尋

接伴贈相送諸公

曉隨幽徑踏行雲
挂頰南山眼界新
馬上客塵良自笑
山中梅意欲驚春
清愁有底能隨酒
世道何方可問津
賴有諸公同一笑
得舒軟語話情親

送趙安定弭節三衢

茅土真封輔帝畿，天潢近派冠彤墀。
當機久契拈花笑，示病何勞闔國追。
北闕暫違文石陛，西風正是菊花時。
瘦筇短褐他年去，洗雨濛煙訪習池。

送王制置帥成都剛中

從來吳蜀勢相親，制閫今勤侍帝臣。
可但覆甌稱直道，暫煩分陝濟斯民。
劔關日下山河重，井絡天開號令新。
聖主遂寬西顧念，遨遊正及錦江春。

送子威兄歸邵武

閩浙相望一寸心
鵠原落莫歎孤音
三年情話空相憶
午里閒門肯見尋
只擬連牀常對語
豈堪垂老更分襟
他時果許鄰幽築
莫倦天台塵土深

送子芬年家之官越

清潤丰姿玉不瑕
篇章典重見詞華
韜鈴小試諸侯幕
事業共稱丞相家
蓬閣晝長宜嘯詠
山陰春蚤已鶯花
鳳池自是風流在
行見金門帽帶斜

送人倅潮陽

情文俱至接交親折節如君未有鄰垂捧不妨希孟德
榮親當復比安仁碧雲斜日羊山路黃葉西風鱷水濱
嗟我殊鄉遠良友尚堪病眼看征輪

送楊子寬還臨安寄錢處和

送客天台不上船東風款段喜揚鞭山容閣雪曉猶冷
花色烘雲春正妍壠上麥芒猶綠嫩枝間梅子漸青圓
有懷閣老應詩罷畫捲珠簾按管絃

送王道錄桐栢住庵

蚤覺人間萬事非，便尋幽遠淨征衣。
每嗟老境難辭老，政使歸時未得歸。
物外無思皆妙道，塵中有患更危機。
羨君行李翩然去，瓊闕從茲兩子微。

送殿幹譙公暫歸蒲田

暫輟京塵擾擾間，一鞭行色冒春寒。
梅花細雨資能賦，野水逢山好據鞍。
引道頗聞辭魏闕，覓官況可近長安。
掀髯西笑歸宜蚤，應及蒲閩荔子丹。

和鄭康道

耕隱春江水盡頭一鄣已自鄙通侯好辭遽作春半別
歸意欲兼天際流我尚未栽三徑竹君能先泛五湖舟
要來便作乘風客莫使煙光有許愁

和謝景英提幹

公家繡戶壓城垣物采隨時入懶軒人倚層樓風滿檻
江涵秋影月當門騰聞薜淥羅襦麗醉看金荷燭影昏
可但頽然信真率亦思秀句得重論

和曾守東郊賞梅兼送范子芬

溪曲山橫動曉光
天開玉雪照崇岡
不妨花陌依微雨
為洗春風澹薄妝
送別休歌河滿子
相思留待返魂香
坐中客已都腸斷
何況離聲更抑揚

和紹興次子所寄詩

連旬零雨暑猶強
未信人間八月涼
瓮裏麴生初泛蟻
壺中桂子並尋芳
斑衣未遂蘭玉集
吾子少留雲水鄉
門戶喜猶家法在
詩情輒莫似王陽

和人惠詩

從來五技已成窮，顧我方今五技中。
治絮不能防暴冷，擁爐聊復借微烘。
懷鄉固與我同志，浮膽懸知酒有功。
待約杯盤尋一醉，醉來寧復問山豐。

老景逢春每多留，賞子美所謂老去願春遲。
子忱雅知其況，以佳句見貽，信筆為答。

吾儔春味等閒情，識我幽花種繞亭。
雲帶竹光天外碧，風回松吹夢中醒。
尊壘湛綠邀芳景，紅翠收香拂夜屏。

歸傍清池留未足更看涵泳一天星

答趙周卿

柴扃小隱二林間德有鄰兮跡遂安支派發源公雋秀
客情催我老蹒跚松留日腳秋煙薄塔響風鑿夜月寒
頗喜笑譚皆自在兵戈聚首蓋良難

和英上人見寄

華鯨吼雨曉聲長詩罷蕭閒百步廊倚暖花梢清有思
傲霜菊蕊冷猶香好閒懶瓚聊煨芋不病維摩尚倚牀

滿眼雲山應自足，笑渠門外馬蹄忙。

奉答國器見貽

連朝好語見勤渠，得失從來要一如。公但忘情支定事，

天交更讀未看書。柳藏窈窕金千縷，月在西南玉一梳。

倚熟何妨駐行李，神仙亦復喜樓居。

時鄭館于家之東樓

再酬丁尉

九皋仙緒豈凡門，肯顧衰翁笑語溫。槐里少留傳好句，

楓宸固已奏嘉言。瀟瀟野水山連碧，嫋嫋新涼月挂昏。

妙筆搗華想高興政須檀板與清尊

用前韻酬陳判官

刺桐花發照人明
三看薰風舞絳英
海近魚肥隨米賤
山高溪淨照人清
久聞射策先黃甲
何意棲鸞尚赤城
顧我婆婆老林下
看君事業映簪纓

寄儲子椿

卓犖姑溪有隱君
當年遠識達楓宸
鑑明塵土無留跡
水淨妍媸久自真
聞道燕居求性理
固應有暇對閒人

一鄺已約同藏海他日茅齋定卜鄰

懷趙希元

久懷宣殿浮山老句滿東南著老成一笑忘言尋小隱
十年去國得雙清別來體力兼人健喜甚詩書滿意評
天子中興求讜論故應啓沃慰平生

榮侍郎暫寓張園小詩寄懷

家來三樂益芬芳不受華堂借草堂每聽鳴騶傳陋巷
便知寶勒下明光炊煙茶潤兼旁舍蘿月松風共一岡

錦瑟待聞方醉卧西樓橫玉助新涼

遊惠山

舊約溪山拄瘦筇踏雲漸聽短長鐘山腰古佛闕金殿
石眼細泉噴玉龍欲濯泠泠終日水且臨楚楚一庭松
知公弭節期遊勝看取詩來阮仲容

黃灣書事

海濱鼓角動星辰我復驅貧近海濱強對溪山方袖手
不堪梅柳已驚春新元北客愁邊淚故國西郊日暮塵

誰與高寒伴幽獨雪聲清夢入霜筠

出關

筍輿清曉出都門便喜松聲到處聞可但佳遊今止止
試尋舊友只紛紛卑棲故傳吳楚語高意自同鸞鶴羣
且樂退身無罣礙滿襟塵土逐春雲

無錫得次子詩促歸

老大心情不外求得閒歡喜且閒休每思塵土年華老
欲接神仙汗漫遊三月不知春爛漫五旬恰值雨飛浮

催歸又誦吾兒句便且呼童上小舟

閒過小圃督治冬蔬

山園乘興便忘歸習靜關情萬事非
落葉翻紅垂露網
小梅藏白倚苔磯等看朔雪連雲密
數得棲鴉幾陣飛
台岳久慚猿鶴怨水雲三合寸心違

台城雜詩

向來小築久鉏荒更覺閒
中日月長山腳孤煙迷市井
岡頭斜照下牛羊乘查未喜閒
侵漢騎鶴何求再上揚

簡寂新詩清有韻
雨隨擊節助浪浪

海色天容浸冷光
秋回山谷進風涼
不須悟性三闕語
自有澄心一炷香
倦客棲遲歸意遠
暮林搖落晚山長
從來習氣聞風悅
慚愧如今陞楯郎

謝賜宸翰扇

恩從清暑殿中傳
鳳翥龍盤墨色鮮
何物老臣容拜賜
御風挾月下中天

上元前四日宣召賞梅

冉冉東風春乍回
睿思宣入禁中來
忽參鼻觀清香徹
殊喜一庭都是梅

德壽春帖子

椒房懿德慶源同
環佩雍容冠六宮
妝罷朝元無一事
關雎詩詠二南風

端午帖子

辟兵龍印篆神經
繫臂香縈繡色輕
自有微涼生玉宇
池光靜照午陰清

日華露重疎疎竹寶砌風回楚楚松酪粉冰壺驅溽暑
瑤琴永日得從容

雨後風微荷芰香頓驅初暑作疎涼黑雲卷盡青天大
卻倚湖光看夕陽

宮詞

鬱蔥佳氣轉春風五色雲低駐玉龍紫府清都天不遠
翹鴟渾在翠微中

南山迎座曉雲開閭闔風遲絕點埃受職百神知有象

會稽春色過江來

潮隨春漲雪千尋
南越山藏暗浪深
欲識錢塘兩回汛
便如萬國奉君心

務農春詔將臣宣
欲翳禾麻變有年
聖意且耕仍且戰
稍令諸道作屯田

江淮控制接荆蠻
銷患無形仗衛閒
藹藹東風符帝力
新春先到鳳凰山

天開黃道日華明
細細南薰下太清
宮殿雲扶龍虎氣

樓臺風轉管絃聲

禁直偶作

緩移淑景覺暄妍
春晚尤宜聽管絃
院宇日斜花欲睡
池塘風澹柳初眠

守閘書事時已退居

薄陰踈雨濕春容
兩岸增添綠與紅
短檝悠悠了無事
卻憐雲水舊怱怱

接伴書懷

客路空過桃李春
塞塵濕遍馬蹄痕
薺花如雪臺苗老
應有垂楊綠映門

遊蓮峯

絕壑垂蘿蓮出泥
靈根瀉碧漱春曦
支筇得住煙雲上
賸看飛流濺沫時

道過京師

都城百雉曉雲空
四塔亭亭倚望中
自是老懷多感慨
一襟清淚濕秋風

到飛泉

曉入飛泉帶月華
山如相識路如家
百蟲不響露初下
開盡一川蕎麥花

政府生日

凜然漢相萬人英
勲德綏懷海宇清
聞道茅峯獻新植
松芽看到茯苓生

和賀子忱

雨餘屐齒不妨泥
自課家丁細理畦
尚有種花移竹意

要令好鳥入春啼

一川清露泣黃花
拜婦人歸石路斜
我亦天涯淪落客
丘園回首亂雲遮

和何季崇簽判

羈思登臨已怯秋
紫萸黃菊更添愁
海光不動暮山紫
人在天涯空倚樓

和范倅

巖壑未銷連夜雪
松篁深映一川梅
忍寒故作遲遲去

只為清香特特來

喧喧暮雀啁寒枝夜雪澄光入錦帷示病維摩元不病
要收好語入新詩

輕綃乍試依微巧蠟白仍隨掩冉春忽得新詩知節物
衰遲渾似夢中人

對雪惘然懷酒伴縈心還復為詩魔老農心念須三白
漁父家風想一蓑

和雙溪

從來絕粒喜留侯作箇庵成漫幾秋未得歸休桐柏去
每尋故老話台州

和蘇養直題孫郎中扶疎堂

白頂鴉兒趁曉啼稍稍寒柳出疎籬未飛臘雪連天白
且看江雲四面垂

和李判院宿松隱見貽

又看歷日改新元卦氣怱怱過二年老境尤於光景惜
斜陽時候每茫然

和李伯時韻送行

公來觸熱冒炎雲風義凌虛獨有君但覺一家增喜色
便如滿座揖清芬

居臨潮落潮生地占得溪南溪北雲紫陌清歌同聽曲
丹丘連日喜逢君

老病衰殘得養閒語離可復對秋山只應今夜相思夢
同渡江雲水石間

送曾劬父還朝

識公政事在愷悌接物情
文惟至誠天台兩歲士民說
要雨雨來晴便晴

借寇何能共此邦
離懷未易寸心降
惟將老淚逐梅雨
流入玉溪同一江

送徐正時之官贛州

君方贛水赴除書
百舵橫江信所扶
他日鴈山新鴈到
問先曾過赤城無

送選兄歸天台

一笠彌天亦大奇
選公訪我索新詩
赤城歸去應相憶
十里松風月上時

小軒偶成

纔添祿廩便添事
豈若清貧自在閒
常恨吾廬無水石
漫將青竹當青山

戲示子舍

日日有花終日賞
時時酌酒亦時醒
今年賸得優游樂
亭榜宜書醉景亭

題扇

薰風過雨到池臺
綠蔭都無一點埃
傍架垂垂薇露重
糝枝已有橘花開

東風已過曉天晴
尚有飛來柳絮輕
卷起珠簾窓戶靜
一番新綠照人清

慣向青林與碧溪
幽居竹石自相宜
種成滿眼花堆錦
開落如今總不知

草紫平碧柳舒金
春色融融積漸深
巢燕高低尋畫棟

宿雲濃澹作輕陰

老境唯期得醉歌
何能浩蕩涉風波
關山月白聞歸鴈
風雨秋深想釣蓑

殘春已去不堪招
猶喜鶯聲破寂寥
花片片飛風弄蝶
柳陰陰下水平橋

秋風天淨絕纖痕
且喜新涼莫更論
坐上卷簾人未醉
秋香滿院月黃昏

燕尾溪頭晚色分
蜂腰山斷日斜曛
半篙碧靜秋垂釣

一權黃昏冷載雲

題人畫扇

柳已如眉拂上林
細風吹動綠煙深
東君巧欲裝春色
更引黃鸝囀好音

題建寧府分水嶺鋪

三年閩海類飄萍
今近天樞第一星
雖是玉京猶萬里
江南山已望中青

題泉州延福寺壁

春深猶未試春衣
漠漠輕寒酒力微
堪笑楊花太輕薄
澹煙細雨不教肥

題張太尉畫

一帶煙沙接冷雲
平林寂歷夕陽昏
輕舟急漿歸何處
應住山前黃葉邨

題董亨道畫西湖

湖上秋山翠作堆
湖光千頃漾漣漪
曉雲貼水菰蒲冷
正是吳江楓落時

贈問丘民表

四寂無人雪在巒
喜君乘興酒腸寬
上方歸路踏梅影
霜月一庭天正寒

題李次仲庵中

杖藜乘興出江頭
自挂青錢買小舟
祈問仙翁餐玉法
便風一日到嚴州

題山景

林薄空濛未見花
縈紆一徑向溪斜
杖藜倚待船中客

山崦同尋賣酒家

蔡提舉野望亭邀同賦

飯了從容人豈知一江風月入新詩
登臨莫負野望處更看冷雲堆浦時

雜詩

孤山不復訪林逋杖策東風踏碧蕪
九里蒼雲行曉徑四圍碧玉照晴湖

雲際翻風斷鴈斜城陰薄暮噪棲鴉
春溶落景寒猶嫩

望盡遙天數縷霞

景陽未下水雲鄉
梅影搖寒月一窓
欹枕夢能歸放隱
滿帆煙雨渡濤江

曉天梅潤喜追涼
湖上夷猶興自長
清耳要聞蒲稗雨
擎舟深入水雲鄉

此生擾擾事無窮
脫得閒身石火中
聊種柴桑三徑菊
未輸巖瀨一絲風

危亭欄檻倚江干
飯了登臨得暫閒
林木巧隨高下路

山容都在有無間

飛去鶯兒黃一點壓低梅子綠團枝鉤窓卷箔涼生坐
但覺新陰轉影遲

一山孤秀隱溪雲溪影涵光隔世紛松竹徑深涼意透
衣巾不覺午風薰

道人身在水雲鄉誦罷楞伽日乍長滿坐好風驅熱惱
一庭濃綠作清涼

款段揚鞭過雨邨沙平步穩轉山根好花一簇牆頭見

深院誰家尚掩門

枕上聞杜宇

催曉鐘殘景氣清
杜鵑聲裏夢魂驚
山林廣袤不知樂
猶作不如歸去聲

初夏松隱看雨

細細南薰氣已深
午來庭戶作煩襟
雨雲不向西山出
只在青天忽變陰

光孝病中聞予與印在天封亦冒雪見過

老病維摩方丈開天風破冷舞瓊瑰滿山皓色作和氣
知是道人衝雪來

南園有懷

江上春陰一櫂閒濕雲遮岫有無間輕莎細雨未歸得
且看重重疊疊山

和雙溪

從來野性自由身正欲山行不亂羣小築與君今不遠
松蘿只隔一山雲

夏日偶成

梅溽霏微晝景長
竹吹清潤著衣裳
未妨燕坐連宵雨
且對澄心一炷香

天台書事

老來少睡怕房櫳
欲睡還休被屢烘
半夜披衣還打坐
耳邊聽盡兩山鐘

清曉鴉啼睡夢間
喜聞飛雪滿前山
攬衣忙作披衣意
不問輕寒且憑欄

香火尋盟欲過門，相迎道地盡先論。
路從舍北清溪曲，家在縣東黃葉邨。

春晚

楊柳密栽煙外縷，丁香嬌結雨中愁。
細推物理何能久，且作東風爛漫遊。

新荷貼水翠田田，綠滿花梢午影圓。
飯了從容春事靜，螭頭閒掬水濺濺。


雨作

倒海傾潮翻白雨，鉤窓卷箔度清風。
江山一餉驚雷靜，已有閒雲行碧空。

泛湖次柳洲

一櫂西風意不闌，解頤風約水雲寒。
瀾瀾細浪蓬邊去，疊疊青山枕上看。

淨舍閒乘一葦杭，入門松竹獻清涼。
倚欄澄碧龜魚樂，照眼荷花風露香。



宋百家詩存卷十四